

ALVAGNI: prelecziun cun Linard e sia feglia Silvana Candreia

## I pareva tg'el fiss preschaint

**G.N.S.** En auditori interessu, istorgias plagn tensiun, cant d'ena donna cun ena vusch da bellezza ed ena seira da plascheir. Chegl è stada la vernissascha dalla pi nova ediziun digl scribent Linard Candreia: «Der alte Russ».

Sonda passada vess er savia esser ena seira d'aton digl 1840, chel onn cura tg'igl emigrant Peter Petrovitsch Balzer è turno dalla Russia an sia patria materna ad Alvagni Bogn. Aint igl «envia» ad Alvagni ins è gia l'impressiun tgi las radond 80 persungas seian neidas per santeir tge tg'igl emigrant e convaschign «signour Balzer» saptga rachintar da chels passa 20 onns tg'el è passanto an Russia scu pastizier dalla classa superioura. Surpiglia la rolla da Peter Petrovitsch Balzer è alloura Linard Candreia e la donna digl pastizier, chella vess tgunsch savia esser Silvana Candreia, sia feglia tg'è sa preschentada cun en carisma singular e plagn expressiun agl public. Linard Candreia è alloura rachinto blier dalla veta da Peter Petrovitsch Balzer e chegl uscheia real, tg'ins è durant l'antiera prelecziun propi gia l'impressiun tgi igl «vigl Russ» seia preschaint.

### En cumgea emoziunal

Siva tgi Silvana Candreia è an en bung e retoricmaintg perfetg tudestg laschea repassar igl batten da Peter Balzer tg'è naschia igl 1797



Gist frestg or dalla stampareia. Igl pi nov codesch da Linard Candreia: «Der alte Russ».



Ena prelecziun cun cant, musica e bels plets. (da san.) Silvana Candreia, sies bab Linard Candreia ed Alfred Brenn, egna dallas persungas tg'ò do bleras infurmaziuns agl autour.

scu feagl d'ena famiglia purila ad Alvagni Bogn è alloura igl scribent adatto la sia vusch a chel de tgi igl mat dalla Val Alvra è partia cun 17 onns vers Odessa per vaseir en oter mond. Igl antier vistgia a chel cumgea è Silvana Candreia do cun interpretar ena canzung tg'è eida fitg a fons e tg'ò confirmo tgi Peter Balzer è mess la sia carezzada Val Alvra, la cuntrada stimada, igls pi bels craps, igl suglegl e schizont la cascada tg'el veva fitg a cor an sies lascher. Schizont igl tshivlem digls utschels è igl gioven Surmiran piglia cun el per avoir pi paca malancuneia an Russia. Silvana Candreia è integro chel tshivlem ainten la sia cumposiziun dalla canzung da cumgea cun ena melodia tg'è eida a cor.

### Fatg cunaschientscha cun la donna nobla

A Linard Candreia è er reuschia da rachintar an moda tgapibla igl viadi digl gioven mat Grischun, da sies datgesa anfignen ad Odessa. Lò vegia Peter Petrovitsch Balzer betg angal gia simpel, mabagn er gia da luvrar blier. Cun dislocar d'Odessa a Moscau è alloura svaneida la sumbreiva ed an curt taimp è igl pastizier gia angal ple deis cun blier suglegl. Sies affar fluriva da de tar de, la sia clientella tutgiva tar la noblezza dalla capitala russa e sia donna Karoline von Ersamus era da gronda bagnstanza. Igl Grischunes geva or ed aint digl Kreml scu tgi chel bietg fiss la sia tgesa

paterna ad Alvagni Bogn. Ma plascheir e tristezza è er tigl pastizier da renom ias a pèr. A Silvana Candreia è reuschia cun la sia vusch sonora da dar a chella tristezza e malancuneia da Peter Petrovitsch Balzer en mantel, tgi vess do ad el igl tgod tg'el duvrava per surlivgier chel mal. La canzung d'amour tg'ella è mess an plets e notas pigl adia digl pastizier da Moscau, cura tg'el è turno an sia patria la Val Alvra è stada, scu tot las otras, en veir deletg cantic interpreto cun tung e sung.

### Igl davos Ave Maria

Impressiunonta e fitg expressiva è alloura stada la fegn dalla prelecziun, igl taimp deditgia agl return digl «vigl Russ» ed agls davos onns anfignen chel de tg'el è dastgea ambratscher sia tgera donna dall'otra vart digl mond. Silvana Candreia è sottamess la seira dalla veta e la mort da Peter Petrovitsch Balzer cun en Ave Maria, cun en angraztg per mintga schintgetg retschet sen chest mond e cugl grond cor tgi igl om digl Bogn Alvagni varo gia per bliers an la sia lunga veta dad 86 onns. Da liger igl codesch ins so angal cunsigliier, en codesch scretg an en bung tudestg, an rumantsch d'Alvagni ed en ovra tgi bleras persungas on contribuia la sia part per tgi chel seia oz sen meisa. Chegl èn tranter oter Reto Beer, barmeir, Alfred Brenn, anteriour scolast, Michail Schischkin, scribent russ e naturalmaintg igl autour Linard Candreia.